



## U ovom broju:

- ➔ BUDŽET ZA 2019. GODINU
- ➔ REALIZACIJA KAPITALNIH PROJEKATA
- ➔ ZAVRŠENI RADOVI U POSLOVNOJ ZONI GLINIŠTE
- ➔ GRADNJA KANALIZACIONE MREŽE
- ➔ PRIZNANJE IZVRSNOSTI
- ➔ START UP IDEJE MLADIH



**OPĆINA TEŠANJ**

Trg Alije Izetbegovića 1

[www.opcina-tesanj.ba](http://www.opcina-tesanj.ba)

e-mail: [optesanj@bih.net.ba](mailto:optesanj@bih.net.ba)



## OBAVIJEST POLJOPRIVREDNICIMA

Obavještavamo sve poljoprivrednike, pravna i fizička lica, upisana u Registar poljoprivrednih gazdinstava i Registar klijenata, da su u skladu sa članom 14. Pravilnika o upisu u Registar dužni do 31.03.2019. godine, izvršiti ažuriranje podataka odnosno prijavu promjena na svom poljoprivrednom gazdinstvu kod općinske službe koja vodi Registar.

Ažuriranje, odnosno prijava promjena podataka u Registru poljoprivrednih gazdinstava i Registru klijenata je preduslov za ostvarivanje prava na novčane poticaje poljoprivredi na federalnom, kantonalnom i općinskom nivou.

Za sve dodatne informacije možete se obratiti u Službu za finansije, privredu, komunalne i inspeksijske poslove Općine Tešanj, kontakt osoba Tamara Turkić.



Izdaje: **OPĆINA TEŠANJ**

**Redakcija:**

Edina Kadušić, Samir Brka,  
Kanita Gredelj i Bahrudin Noćić.

**Glavni i odgovorni urednik:**

Edina Kadušić

**Adresa Redakcije:**

Općina Tešanj, Trg Alije Izetbegovića I  
74260 Tešanj

**Telefoni:** 032 650-341 i 032/650-022 (lokal 107)

**Fax:** 032/650-220

**E-mail:** [press@opcina-tesanj.ba](mailto:press@opcina-tesanj.ba)

**Tiraž:** 2.000

**Štampa:** Grafik-komerc

## FORMIRANJE POSLOVNE ZONE LJETINIĆ

Na 23. sjednici Općinskog vijeća Tešanj koja je održana u petak, 30. novembra usvojen je nacrt Odluke o provođenju Zoning plana Poslovna zona Ljetinić.

Obuhvat Zoning plana iznosi cca 49 ha, te predstavlja obuhvat dijelom izgrađeno, a dijelom neizgrađeno građevinsko područje koje se nalazi u naselju Ljetinić između magistralne ceste i rijeke Usore.

Planirana Poslovna zona Ljetinić naslonjena je na magistralni put sa južne strane, dok je sa ostalih strana omeđena poljoprivrednim zemljištem u kombinaciji sa individualnim stanovanjem i poslovno-proizvodnim objektima.

Lokacija zoning plana je takva da povezuje zonu privrednih djelatnosti i zonu ruralnog karaktera. Granice i obuhvat poslovne zone "Ljetinić" desfinisane su Odlukom o pristupanju izradi Zoning plana.

S obzirom na osnovu namjenu zone predmetno područje podijeljeno je u zone:

- zona saobraćaja
- stambeno-poslovna zona
- proizvodno- poslovna zona
- zona zelenih površina.



# BUDŽET OPĆINE TEŠANJ ZA 2019. GODINU



- \* Na 24. sjednici Općinskog vijeća Tešanj, jednoglasno je usvojen Budžet Općine za 2019. godinu.
- \* Usvajanju Budžeta je prethodila izrada nacрта i provođenje 6 termina javne rasprave u kojima je učešće uzelo 48 lica, te usklađivanje stavova na odvojenim sastancima organizovanim sa predstavnicima klubova Općinskog vijeća.
- \* Budžet za 2019. godinu iznosi 19.475.000 KM.
- \* Kapitalni dio budžeta čini 48,12% ukupnog Budžeta i iznosi 9.371.000 KM.
- \* Najznačajnije planirano ulaganje iz Budžeta za 2019. godinu čini nastavak radova na Projektu prikupljanja, odvodnje i prečišćavanja otpadnih voda od 3,5 miliona KM (ukupna vrijednost preko 20 miliona KM). Pored toga, planirana su sredstva za nastavak projekata vodosnabdijevanja od 820.000 KM, nastavak gradnje sportskih dvorana osnovnih škola od 400.000 KM, nastavak uređenje industrijskih zona i mnogih drugih projekata direktno lociranih u Budžetu ili kroz plan kapitalnih investicija.

\* Visina i struktura prihodovne i rashodovne strane Budžeta je iskazana u sljedećem tabelarnom pregledu:

R. br.	Grupa prihoda i primitaka	Budžet za 2019. godinu	Procent učešća
1	2	3	4
1.	Direktni porezi	2.866.000	14,71%
2.	Indirektni porezi	5.285.000	27,14%
3.	Neporezni prihodi	2.882.000	14,80%
4.	Tekući grantovi	1.170.000	6,01%
5.	Kapitalni grantovi i primici	3.712.000	19,06%
6.	Prenesena sredstva	1.660.000	8,52%
7.	Kreditna sredstva	1.900.000	9,75%
<b>SVEGA PRIHODI I PRIMICI</b>		<b>19.475.000</b>	<b>100%</b>

R. br.	Grupa rashoda i izdataka	Budžet za 2019. godinu	Procent učešća
1	2	3	4
1.	Sredstva za plate i naknade	2.520.000	12,94%
2.a	Direktni materijalni rashodi Organa uprave	1.039.600	5,34%
2.b	Ostale usluge za opštredruštvene potrebe	2.029.000	10,42%
3.	Tekući grantovi, kamate i sredstva rezervi	4.425.400	22,72%
4.	Kapitalni grantovi (transferi) i izdaci	9.371.000	48,12%
5.	Povrat sredstava finansiranja	90.000	0,46%
<b>SVEGA RASHODI I IZDACI</b>		<b>19.475.000</b>	<b>100%</b>

\* Struktura prihodovne i rashodovne strane Budžeta iskazana je u sljedećem grafičkom prikazu:



# TEŠANJ I SANSKI MOST NA EVROPSKOJ SEDMICI REGIJA I GRADOVA U BRISELU



Od 8. do 11. oktobra u Briselu se održavala Evropska sedmica regija i gradova. Tokom četiri dana u Briselu eksperti u regionalnom i lokalnom razvoju, kao i predstavnici EU institucija predstavili su najbolje prakse u EU. Teme koje su okupile oko 6.000 osoba iz cijele EU su: dobre prakse u ekonomskom razvoju i socijalnoj uključenosti, javno-privatno partnerstvo, prekogranična saradnja, lokalne strategije razvoja, budućnost gradova, e-uprava i dr.

Studijsko putovanje je organizirano u okviru MEG projekta, koji provodi UNDP u BiH, a finansira Vlada Švicarske. Delegaciju su činili predstavnici općina Tešanj i Sanski Most, koje su u prvom ciklusu projekta a koji uključuje 18 općina u BiH bile najuspješnije, te regionalni terenski službenici.

## DELEGACIJA MINISTARSTVA LOKALNE UPRAVE PALESTINE POSJETILA TEŠANJ

Delegacija Ministarstva lokalne uprave Palestine posjetila je općinu Tešanj kako bi se upoznali sa iskustvima Bosne i Hercegovine u upravljanju općinama i projektima, upravljanjem u kriznim situacijama i načinom vođenja proizvodnih projekata, lokalnim ekonomskim razvojem, kao i saradnjom i partnerstvom Općine sa privatnim sektorom. Delegaciju su primili Predsjedavajući Općinskog vijeća Senad Subašić i Općinski načelnik Suad Huskić sa saradnicima.



*Drago mi je da smo gostima iz Palestine mogli prenijeti naša iskustva u funkcionisanju i odnosu naše lokalne zajednice sa višim nivoima vlasti, kao i primjere iz prakse kada je u pitanju saradnja sa privredom. Nadam se da će oni dio tih iskustva primjeniti u svojoj zemlji, rekao je Općinski načelnik Suad Huskić.*

Nakon sastanka u Općini, delegacija je posjetila Opću bolnicu Tešanj i firmu Belif.

Delegaciju Ministarstva lokalne uprave Palestine su činili dr. Ali Safi, koordinator delegacije, Omar M.M. Sharqia, generalni direktor Opšte uprave za projekte, Mutasem Y.A.

Anani, inženjer za projekte i infrastrukturu, Nedal Mohammad Suleiman Ali Hasan, direktor Francuskog projekta, Khaled I.M. Eshtaya, generalni direktor Lokalne uprave u Nabulusu i Tareq A. R. Imair, generalni direktor Lokalne uprave u Ramalli.

# PRIJEM POVODOM DANA GRADA TEŠNJA

Povodom općinskog praznika 10. decembra – Dana grada Tešnja upriličen je svečani prijem. O značaju obilježavanja 10. decembra govorili su Predsjedavajući Općinskog vijeća Senad Subašić i Općinski načelnik Suad Huskić.

*Na današnji dan, prije 459 godina Gazi Ferhad-beg je uvakufio svoje posjede za razvoj grada Tešnja i njegove okoline. Tim činom Tešanj je dobio urbane sadržaje. 2018. godinu mi završavamo kao prilično uspješnu - rekordnu godinu prema nekim pokazateljima. Ponosan sam na rezultate, ali i svjestan da su pred nama novi izazovi i prepreke, koje ćemo zajednički savladati, jer radimo za dobrobit općine Tešanj, rekao je, između ostalog, u svom govoru Općinski načelnik Suad Huskić.*

Svečanom prijemu povodom Dana grada Tešnja prisustvovali su vijećnici, predstavnici vjerskih zajednica, direktori javnih ustanova i preduzeća, predstavnici političkih stranaka, privrednici i mediji.

Prema odluci Općinskog vijeća Tešanj, općinski praznik 10. decembar sjećanje je na daleku prošlost kada je vakif Gazi Ferhad-beg utemeljio Tešanj kao urbanu sredinu.



## DELEGACIJA SANSKOG MOSTA POSJETILA TEŠANJ

Načelnik općine Sanski Most Faris Hasanbegović sa saradnicima posjetio je Tešanj i ovom prilikom se sastao sa Općinskim načelnikom Suadom Huskićem. Sastanku su prisustvovali i Predsjedavajući Općinskog vijeća Senad Subašić i pomoćnici Općinskog načelnika Azra Muslija i Hamzalija Hojkurić. Cilj posjete je upoznavanje sa prednostima koje Tešanj ima, kao i razmjena iskustava kada su u pitanju određeni projekti.

*Općine Tešanj i Sanski Most su bile najuspješnije u projektu MEG u odnosu na sve druge općine koje su sudjelovale. Mi smo pronašli stvari koje možemo naučiti jedni od drugih. Ponudili smo svoja iskustva da podjelimo u potpunosti, a i sve što možemo prepoznati u Općini Sanski Most kao korisno i interesantno za Općinu Tešanj želimo primijeniti, rekao je Općinski načelnik Suad Huskić.*



Nakon sastanka u Općini Tešanj, delegacija je posjetila Komunalno preduzeće RAD Tešanj.

## SASTANAK SA PREDSTAVNICIMA MJESNIH ZAJEDNICA



Općinski načelnik Suad Huskić sa saradnicima održao je sastanak sa predsjednicima savjeta i sekretarima mjesnih zajednica sa područja općine Tešanj. Sastanak je upriličen kako bi se razgovaralo o realizovanim projektima i projektima koji nisu završeni, kao i prioritetima za naredni period.

*I ove godine predstavnici mjesnih zajednica su iznijeli prioritete kada su u pitanju projekti za 2019. godinu, kao i očekivanja za naredne dvije godine, a sve kako bismo pripremili kvalitetnu Listu kapitalnih projekata za 2019. godinu, i znali planove za naredni period, rekao je Općinski načelnik Suad Huskić.*

## PREDSTAVNICI MZ KALOŠEVIĆ I DOBROPOLJE-MEKIŠ NA SASTANAKU SA OPĆINSKIM NAČELNIKOM

Općinski načelnik upriličio je odvojene sastanke sa dvije mjesne zajednice. Sa predsjednikom Savjeta i Skupštine MZ Kalošević tema razgovora su bili aktuelni problemi u vodosnabdijevanju. Naglašeno je da je u toku projektovanje novog bunara, te da to predstavlja dugoročno rješenje. U pogledu kratkoročnih rješenja razgovarano je o mogućnostima korištenja postrojenja za preradu vode koje je u vlasništvu Kantonalne uprave Civilne zaštite ZDK. Usaglašene su naredne obaveze.

Sa predstavnicima MZ Mekiš-Dobropolje razgovaralo se o razvoju sistema vodosnabdijevanja u naselju Mekiš, prioritetima za 2019. godinu, upravljanju Društvenim centrom i nogometnim stadionom. Definisane su aktivnosti općine i organa mjesne zajednice za naredni period.



## SASTANAK SA PREDSTAVNICIMA MZ TEŠANJKA



Općinski načelnik Suad Huskić sa saradnicima održao je sastanak sa predstavnicima MZ Tešanjka, a sastanku su prisustvovali i predstavnici lokalnog vodovoda i KP RAD. Ovom prilikom razgovarano je o radu i funkcionisanju lokalnog vodovoda, koji je privatno vlasništvo i kojeg koristi 179 domaćinstava, kao i o nedostatku vode i redukciji.

Dogovoreno je da se u narednim danima odrede predstavnici vodovoda, nakon čega će uslijediti razgovori oko rješavanja daljeg funkcionisanja ovog vodovoda.

# ODRŽANA 24. SJEDNICA OPĆINSKOG VIJEĆA

U četvrtak, 27. decembra 2018. godine u sali Općinskog vijeća Tešanj, sa početkom u 13,00 sati održana 24. sjednica Općinskog vijeća sa predloženim dnevnim redom:

1. Prijedlog Budžeta Općine Tešanj za 2019. godinu,
2. Prijedlog Odluke o izvršavanju Budžeta za 2019. godinu,
3. Prijedlog Odluke o zonama sanitarne zaštite i zaštitnim mjerama za izvorište "Bunar PEB - I",
4. Prijedlog Odluke o davanju saglasnosti na Metodologiju za formiranje cijena vodnih usluga,
5. Informacija o rješavanju statusa vodne i kanalizacione infrastrukture Općine Tešanj,
6. Prijedlog Odluke o davanju saglasnosti za dodjelu koncesije,
7. Prijedlog Odluke o izmjenama i dopunama Odluke o organizaciji i sigurnosti saobraćaja na cestama,
8. Prijedlog Odluke o usvajanju Programa gospodarenja poljoprivrednim zemljištem,
9. Prijedlog Odluke o raspisivanju javnog poziva za zakup poljoprivrednog zemljišta u vlasništvu države na području općine Tešanj,
10. Prijedlog Programa rada Općinskog vijeća Tešanj za 2019. godinu,
11. Prijedlog Rješenja o imenovanju komisija Općinskog vijeća Tešanj.

Nakon što je vijećnik Vedran Kaser (SDP) dobio mandat u Skupštini ZDK, na današnjoj sjednici, svečanu izjavu je dao novoimenovani vijećnik Hasan Galijašević (SDP).

Na početku sjednice, a na prijedlog Kluba vijećnika SDA posljednja tačka dnevnog reda Prijedlog Rješenja o imenovanju komisija Općinskog vijeća Tešanj, povučena je sa dnevnog reda i ostavljena za narednu sjednicu Vijeća.

Najvažnija tačka dnevnog reda Prijedlog Budžeta Općine Tešanj za 2019. godinu, nakon rasprave je usvojena jednoglasno. I ostale tačke dnevnog reda, Vijeće je prihvatilo i završilo sa radom u 16,25 sati.



## ASFALTIRANJE NOVE ULICE U JELAHU



Završeni su radovi na asfaltiranju i uređenju ulice Željeznički prolaz. Riječ je o potpuno novoj ulici za čiju gradnju je otkupljeno privatno zemljište. Potreba za ovim projektom i ulicom prisutna je nekoliko decenija, ali su se tek ove godine stekli uslovi za realizaciju.

Dijelu stanovništva u Jelahu nova saobraćajnica će olakšati svakodnevno saobraćanje. Projekat finansira Općina Tešanj putem Federalnog ministarstva prometa i komunikacija, a izvođač radova je firma *AB-trans* Tešanj.

## SANACIJA I PROŠIRENJE MOSTA U TEŠNJU



Počeli su radovi na sanaciji i proširenju mosta u Tešnju kod Šarenog mekteba. Ugovorom su planirani radovi proširenja mosta za potrebe pješačkog saobraćaja, a obuhvata radove iskopa, betoniranja temelja i stubova obalnih oslonaca, ugradnju montažne nosive AB konstrukcije, asfalterske radove i zamjenu ograde.

Također, planirana je sanacija postojeće konstrukcije mosta od površinskog oštećenja.

Radove izvodi firma *Inženjering I* d.o.o. Tešanj, a nadzor *Arh studio* d.o.o. Tešanj.

## SANIRANI KAZAMATI NA STAROM GRADU TEŠANJ



Završeni su radovi na sanaciji dva kazamata ispod šestougaone Tabije na Starom gradu Tešanj u Tešnju. Radovi su obuhvatili sanaciju kamenih zidova dva kazamata, zatim sanaciju zida od Tabije do Krmje kule, dersovanje svih saniranih površina i radove elektroinstalacija u kazamatima.

Radove je izvodio *GR Ševko Elez* Tešanj, nadzor *Arh studio* d.o.o. Tešanj i Zavod za zaštitu spomenika Sarajevo.



# POSJETA GRADILIŠTIMA NA PODRUČJU OPĆINE TEŠANJ

Općinski načelnik Suad Huskić sa saradnicima, u društvu predsjedavajućeg Općinskog vijeća Senada Subašića i izvođača radova posjetio je gradilišta – radove na gradnji primarne kanalizacione mreže na području općine Tešanj. U toku su radovi na izgradnji kanalizacije na dionici *Miljanovci (Palučak) - Jelah Polje – Jelah, Novo Selo – Tešanjka i Žabljak – Kraševo*. Dionica primarnog kanalizacionog voda kroz Poslovnu zonu Glinište je završena.



U 2018. godini, potpisan je ugovor za gradnju 12 km primarne kanalizacione mreže na području općine Tešanj ukupne vrijednosti 4,4 miliona maraka.

Prethodnih godina (2015., 2016. i 2017.) završena je prva faza od 14 km kanalizacione mreže, ukupne vrijednosti 6,6 miliona maraka. Od 2015. godine do danas u projektovanje i gradnju 26 km primarne kanalizacione mreže uloženo je 11 miliona maraka.

## ASFALTIRANA DIONICA PUTA U MZ TREPČE

Završeni su radovi na sanaciji i rekonstrukciji dionice puta *Šacirovici-Šljivice* u MZ Trepče.

Projekat je finansiran iz GSM sredstava i učešća građana. Izvođač radova je firma *AB trans d.o.o.* Tešanj.




## ASFALTIRANJE PUTEVA NA PODRUČJU OPĆINE TEŠANJ

Završeni su radovi na sanaciji i rekonstrukciji dionice puta *Zema-Alići* i sanaciji i rekonstrukciji dionice puta *Tugovići-Ripna*.

Sredstva za realizaciju su obezbijeđena iz kapitalnih grantova viših nivoa vlasti, GSM sredstava i učešća građana.

Izvođač radova je firma *Dobojputevi d.d.* Doboj Jug i *Geo-put d.o.o.* Maglaj.



## ASFALTIRANA DIONICA PUTA U MZ KRAŠEVO

Završeno je asfaltiranje puta *Donja mahala* u MZ Kraševo. Projekat se nalazi na Listi kapitalnih projekata za 2018 godinu.

Izvođač radova je firma *Dobojputevi d.d.* Doboj Jug.



# SVEČANO OTVORENA ŠKOLSKA DVORANA U ŠIJAMA

Svečanim presijecanjem vrpce, u subotu, 29. septembra otvorena je školska dvorana pored OŠ Mustafa Mulić Šije. Radi se o dvorani čija gradnja je počela 2016. godine, zajedno sa još tri školske dvorane na području općine Tešanj. Za gradnju školske dvorane u MZ Šije uloženo je više od 570 000 KM, od čega je mjesna zajednica Šije uložila 80 000 KM, a ostalo su sredstva Općine Tešanj i ZDK.



*Kada smo prije dvije godine počeli gradnju četiri školske dvorane na području općine Tešanj, postavili smo sebi cilj da svako dijete, odnosno svaki učenik treba imati uslove za sport i tjelesni odgoj. Sretan sam da smo danas svečano otvorili školsku dvoranu u Šijama koja će služiti prije svega mladima, ali i starijim mještanima za rekreaciju. U narednom periodu očekujemo završetak radova i na dvoranama u Miljanovcima, Kaloševiću i Jablanici, rekao je Općinski načelnik Suad Huskić.*

Svečanosti je prisustvovao veliki broj mještana, zvanica i sportskih klubova. U programu su učestvovali sportski klubovi, a nakon prvog dijela programa uslijedile su prve revijalne utakmice. Školska dvorana u Šijama je moderan sportski objekat sa svim potrebnim pomoćnim prostorijama – spravarnicom, svlačionicama, tuš kabinama, tribinama kapaciteta 400 mjesta, te modernim sportskim terenom.

Od 2016. godine, za gradnju četiri školske dvorane na području općine Tešanj uloženo je 1.390.000 KM, od čega je Ministarstvo za obrazovanje, nauku, kulturu i sport ZDK izdvojilo 600.000 KM (43%), Općina Tešanj 630.000 KM (47%), te UNDP i MZ Šije 150.000 KM (10%).

## OBNOVLJENA KUĆA ISMETA MERDIĆA IZ RADUŠE

Općinski načelnik Suad Huskić uručio je ključeve porodici Ismeta Merdića iz Raduše, čiju kuću je u decembru prošle godine zahvatio požar uslijed olujnog vjetrova. Porodicu je nakon nevremena posjetila delegacija Općine Tešanj i Vlade ZDK i tada je obećana pomoć u sanaciji kuće, a danas su i zvanično predati ključevi. Primopredaji objekta prisustvovali su predstavnici Općine Tešanj, Ministar za poljoprivredu, šumarstvo i vodoprivredu u Vladi ZDK Himzo Smajić, te predstavnici MZ Raduša. Radovi su tekli usporenom dinamikom zbog kišnih dana u ovoj godini. Vrijednost radova je oko 46 hiljada maraka. Sanirane su dvije odvojene stambene jedinice, krov je potpuno novi, kao i nove instalacije. Objekat je urađen sa termo izolacijom, novom stolarijom itd. Nadam se da će ova porodica svoj život ugodno i dostojanstveno provesti u ovom stambenom objektu i da neće imati slična iskustva, ni oni ni drugi stanovnici općine Tešanj, rekao je Općinski načelnik Suad Huskić.

Sanaciju kuće zajednički su finansirali Općina Tešanj, Vlada ZDK i građani putem MZ Raduša.



# GRADNJA VODOVODA U MZ RADUŠA

Počeli su radovi na izgradnji vodovoda Raduša, čiju gradnju finansira Općina Tešanj uz podršku UNDP-a, kroz MEG projekat. Ukupna vrijednost projekta je oko 730.000,00 KM, od čega je kroz MEG projekat obezbijeđeno oko 238.000,00 KM, dok Općina Tešanj izdvaja 492.000,00 KM. Završetkom ovog projekta, oko 400 domaćinstava u MZ Raduša će dobiti pitku vodu.

U prvoj fazi planirana je izgradnja gravitacijskog vodovoda, koji obuhvata najveći dio MZ Raduša i jedne pumpne stanice. Rok za izgradnju je črtiri mjeseca ukoliko to vremenske prilike budu dozvoljavale.



# ODRŽANA JAVNA RASPRAVA O UPRAVLJANJU ZGRADAMA KOLEKTIVNOG STANOVANJA

U zgradi Općine Tešanj održana je javna rasprava na nacrt Odluke o uslovima za obavljanje poslova upravitelja zajedničkih dijelova zgrada na području općine Tešanj. Raspravi je prisustvovao veliki broj predstavnika kućnih savjeta, stanara, građana i pravnih lica zainteresovanih za održavanje zajedničkih dijelova zgrada koji su svojim aktivnim učešćem dali doprinos u kvalitetnijem rješavanju ove problematike.




Predstavnici Općine Tešanj su upoznali prisutne sa odredbama općinske Odluke, kao i sa odredbama Zakona o korištenju, upravljanju i održavanju zajedničkih dijelova i uređaja zgrade ZDK. U raspravi su izneseni prijedlozi i sugestije koji će biti uobzireni prilikom izrade prijedloga Odluke.

# AMBASADOR MALEZIJE U BIH POSJETIO TEŠANJ

Ambasador Malezije u Bosni i Hercegovini Nj. E. Zakri Jaafar posjetio je općinu Tešanj i ovom prilikom se sastao sa Općinskim načelnikom Suadom Huskićem. Povod posjete je projekat koji se realizuje u Tešnju putem Malezijskog fonda, a korisnici su dvije tešanjске firme. Radi se o kreditiranju malog i srednjeg poduzetništva.

Tokom sastanka, razgovarano je o razvojnim potencijalima općine Tešanj, kao i o mogućnostima saradnje u narednom periodu.

Sastanku su prisustvovali i predstavnici BBI banke iz Tešnja



# ZIMSKO ODRŽAVANJE PUTEVA, ULICA I TROTOARA NA PODRUČJU OPĆINE TEŠANJ



Općina Tešanj je izvršila sve potrebne pripreme za zimsko održavanje puteva i 48 km trotoara (27 km u Tešnju, Jelahu i Tešanjci i 21 km u ostalim mjesnim zajednicama). Za održavanje 110 km glavnih putnih pravaca i ulica sklopljeni su ugovori sa izvođačima radova, a za lokalne i nekategorisane ceste su obezbijeđena sredstva i prebačena mjesnim zajednicama kako bi one ugovorile 150 km zimskog održavanje na teritoriji svake mjesne zajednice. Regionalne ceste u dužini 30 km i magistralne ceste u dužini 33 km kroz općinu Tešanj u nadležnosti su kantonalnih, odnosno federalnih organa.

Ugovori za zimsko održavanje puteva na području općine Tešanj potpisani su sa firmama AB trans d.o.o. Tešanj, Dobojsputevi d.d. Doboj Jug, Konzorcijem Geo put d.o.o. Maglaj i Almy transport d.o.o. Zenica i JKP Rad Tešanj.

Posjetom izvođačima na zimskom održavanju od strane nadzora, ocijenjena je spremnost svih ugovornih firmi za početak zimske sezone, u pogledu stanja materijala na skladištu, spremnosti tehničke opreme i planovi dežurnih timova. Za očekivati je adekvatnu prohodnost cesta razgrtanjem, tretiranjem posipnim materijalom i noćnom pripravnosti kako bi se izbjegli zastoji i poledica na kolovozu te omogućilo normalno odvijanje saobraćaja.

BIHAMK podsjeća da je u periodu od 15.11. do 15.04 naredne godine obavezno korištenje zimske opreme, bez obzira na vremenske uvjete.

## POTPISANI UGOVORI ZA POKRETANJE START UP IDEJA MLADIH



Općinski načelnik Suad Huskić potpisao je ugovore o poticajima u svrhu pokretanja vlastitih biznisa sa jedanaest budućih poduzetnika – **Ernesom Ahmetlićem** (proizvodnja ručnih radova – suveniri, tkanine, gliničarski proizvodi), **Almom Karahodžić** (proizvodnja meda i usluge API inhalacije), **Mensurom Bešom** (projektovanje i montaža namještaja), **Edinom Krkalićem** (proizvodnja eko pakovanja – fišeci, ugostiteljski šećer), **Adnanom Sejmenovićem** (Agencija za promet nekretninama), **Murisom Muminovićem** (proizvodnja PVC stolarije), **Ademom Šaćirovićem** (brandiranje vozila i zatamnivanje stakala), **Amelom Halilovićem** (građevinski limarski radovi) i **Ahmedom Ramićem** (transport zapaljive i ostale robe).

*U posljednjih osam godina smo imali oko 160 poslovnih ideja, registrovano je 60 poslovnih subjekata, te ukupno otvoreno oko 115 radnih mjesta. Preko 90% poslovnih ideja koje smo pomagali mladima da pokrenu, se održalo nakon isteka perioda u kojem imaju podršku Općine. Zbog toga smatramo opravdanim da nastavimo sa ovakvim projektom i smatramo da vrijedi i dalje ulagati u mlade ljude, kazao je Općinski načelnik Suad Huskić.*

Realizacija projekta *Podrška razvoju Start up ideje mladih* u toku 2018. godine, osim sredstava Budžeta Općine Tešanj, finansijski je podržana i iz sredstava MEG projekta koji podržava i finansira Vlada Švicarske, a provodi Razvojni program Ujedinjenih nacija u Bosni i Hercegovini, te Budžeta Vlade ZDK.

Projekat *Poslovne ideje mladih* pokrenut je 2011. godine i do sada je ponudio različite projekte mladih ljudi. Po ovom modelu Općina finansira troškove registracije preduzeća, doprinose za dio zaposlenih u periodu do 3 godine, a u određenim slučajevima Općina je finansirala troškove zakupa poslovnog prostora.

# OPĆINI TEŠANJ DODIJELJENO PRIZNANJE IZVRSNOSTI

Općini Tešanj, kao najuspješnijoj općini u BiH po rezultatima Projekta općinskog okolišnog i ekonomskog upravljanja (MEG), u Sarajevu je dodijeljeno priznanje izvrsnosti.

U 2016. godini, 18 općina i gradova uključeno je u MEG projekat, koji finansira Vlada Švicarske, a provodi UNDP (Razvojni program Ujedinjenih nacija). Općine i gradovi radili su na poboljšanju pružanja javnih usluga, na boljem upravljanju rezultatima, što je dovelo do poboljšanja kvaliteta rada javnog sektora i kvalitetnijih komunalnih usluga. Konkretni projekti su tretirali izgradnju i obnovu vodovodne i kanalizacione mreže, smanjenja gubitaka vode, ali i ulaganja u poslovno okruženje, podršku poduzetništvu, poticajima zapošljavanju. Kao najuspješnije jedinice lokalne samouprave istakle su se Općina Tešanj, Općina Sanski Most i Općina Žepče.



*Sretan sam da smo ostvarili ovakve rezultate i što smo od nezavisnih institucija ocijenjeni kao najuspješniji. Uspjesi općine Tešanj su rezultat višegodišnjeg predanog rada i pokazuju se u različitim oblastima. U ovom projektu do izražaja je došao kvalitet upravljanja javnim sektorom, strategijom razvoja, finansijama, komunalnim sistemima (vodovodom i kanalizacijom), komunikacijom i radom sa građanima, političkim subjektima, privatnim sektorom i civilnim društvom. Ovo je priznanje koje pripada cjelokupnoj općini, Općinskoj upravi, Općinskom vijeću, Komunalnom preduzeću Rad, pa i meni kao Načelniku. Osim priznanja MEG projekat pružio nam je značajnu finansijsku podršku koju zajednički implementiramo u gradnji vodovoda Raduša, kao i podršku mladima za pokretanje vlastitog biznisa, rekao je Općinski načelnik Suad Huskić.*

Tokom dodjele priznanja Sukhrob Khoshmukhamedov, zamjenik rezidentne predstavnice UNDP-a u BiH, istakao je da ove lokalne uprave postavljaju standarde i primjere drugima kada je u pitanju uvođenje praksi Evropske unije, te naglasio da time direktno utiču na približavanje Bosne i Hercegovine Evropskoj uniji i ostvarivanju Ciljeva održivog razvoja.

Osim priznanja izvrsnosti za tri najuspješnije općine, općine Bosanska Krupa, Gračanica, Gradačac, Gradiška, Kalesija, Kostajnica, Kozarska Dubica, Prnjavor, Sanski Most, Teslić, Tešanj i Žepče, te gradovi Bihać, Cazin, Doboj, Prijedor i Tuzla dobili su priznanja za uspješnu saradnju na MEG projektu.

## OPĆINA TEŠANJ DOBITNIK ZLATNOG KLJUČA PODUNAVLJA

U Novom Sadu, 13. i 14. novembra održan je *Dunavski biznis forum* u organizaciji *Media inventa*, uz podršku Privredne komore Srbije, Privredne komore Vojvodine i Grada Novog Sada. Posvećen je Dunavskoj strategiji u ulozi biznisa u ostvarivanju njenih ciljeva, jačanju prosperiteta i efikasnijem korištenju potencijala.

Na Forumu je, u panel diskusiji na temu *Pametna sela i pametni gradovi* u ime Općine Tešanj učestvovao Općinski načelnik Suad Huskić. Ovom prilikom, Općini Tešanj, za izgradnju i jačanje prosperiteta dodijeljeno je priznanje *Zlatni ključ Podunavlja*.

U radu *Dunavskog biznis foruma* učestvovali su predstavnici iz 14 zemalja, i to Njemačke, Austrije, Češke, Slovačke, Mađarske, Slovenije, Hrvatske, BiH, Crne Gore, Rumunije, Bugarske, Moldavije, Ukrajine i Srbije.



# U TEŠNJU SVEČANO OTVORENA NOVA POSLOVNA ZONA - GLINIŠTE

Povodom završetka radova na izgradnji glavne infrastrukture vrijednosti 2,6 miliona maraka u Poslovnoj zoni Glinište upriličena je svečanost kojoj su prisustvovali predstavnici različitih nivoa vlasti Bosne i Hercegovine, privrednici sa područja općine Tešanj, kao i mnogobrojne zvanice i gosti.

Izgradnjom Poslovne zone Glinište na površini od 76 ha obezbijedene su 33 nove lokacije za investiranje, novom saobraćajnicom su spojeni magistralni put M4 i regionalni put 474. Osim toga novom saobraćajnicom su spojene poslovne zone Glinište i Ciglana.

*Nova Poslovna zona Glinište je naš odgovor na rastući ekonomski razvoj općine Tešanj. Više godina radimo da bismo na vrijeme obezbijedili nove lokacije za investiranje a samim time i nova radna mjesta. Oko 2,6 miliona KM uloženo u ovu Poslovnu zonu je investicija u budućnost općine Tešanj. Sama Općina je iz budžeta izdvojila oko 70% potrebnih sredstava. Imamo već završene investicije u ovoj Poslovnoj zoni, pripremaju se i nove. Gradnja Poslovne zone Glinište je projekat na kojem se može prepoznati strateški pristup i kontinuitet u razvoju općine, a godine pred nama će pokazati sav značaj izgradnje ove Poslovne zone. Uz ovu svečanost najavljujemo nove projekte na kojima radimo, a koji će obezbijediti ekonomski razvoj naše općine,* rekao je Općinski načelnik Suad Huskić.

Prvi radovi u novoj Poslovnoj zoni Glinište su realizovani 2012. i 2013. godine iz sredstava općinskih obveznica. Iz općinskog budžeta u gradnju ove Poslovne zone izdvojeno je 1,8 miliona maraka ili 70%, ZDK je sufinansirao sa oko 500.000 KM, dok su Vlada FBiH i Vijeće Ministara učestvovali sa oko 250.000 KM.

*Izgradnjom Poslovne zone Glinište, Općina Tešanj je pokazala da razmišlja unaprijed, a mi u Vladi Zeničko-dobojskog kantona podržavamo ovakav pristup. I u narednom periodu opredjeljenje Vlade ZDK je da stvara što povoljniji ambijent za razvoj poslovanja naših preduzeća na domaćem i stranom tržištu,* rekao je Premijer ZDK Miralem Galijašević.

Za naredni period očekuje se gradnja nove 110 kV trafo stanice i uređenje kvalitetnijeg priključka Poslovne zone na magistralni put M4.



## DELEGACIJA UNDP-a POSJETILA TEŠANJ

Zamjenik rezidentne koordinatorice UN-a i predstavnice UNDP-a Sukhrob Khoshmukhamedov sa saradnicima, boravio je u radnoj posjeti Tešnju. Tokom sastanka u Općini Tešanj razgovarano je o budućim projektima, kao i o zajedničkim projektima koji se u Tešnju realizuju od 2005. godine.

U okviru Projekta općinskog ekološkog i ekonomskog upravljanja (MEG) koji finansira Vlada Švicarske, a provodi Razvojni program Ujedinjenih nacija (UNDP) Općini Tešanj dodijeljeno je 290.000 KM.

*Općina Tešanj je bila najuspješnija u prvoj fazi projekta MEG u odnosu na sve druge općine koje su sudjelovale i*

*na osnovu toga smo dobili finansijska sredstva u iznosu od 250 000 KM za gradnju vodovoda u MZ Raduša. Osim toga, 40.000 KM je odobreno za projekat Poslovne ideje mladih,* rekao je Općinski načelnik Suad Huskić.

Predstavnici UNDP-a posjetili su danas gradilište – projekat vodosnadbijevanja u MZ Raduša koji se finansira kroz projekat MEG i Društveni centar u MZ Raduša, koji je realizovan kroz projekat Jačanje uloge mjesnih zajednica u BiH.



U periodu od 04.09. do 04.10.2018. godine, od strane Metalurškog instituta „Kemal Kapetanović“ Zenica, putem mobilne stanice izvršeno je osmo mjerenje zagađenosti zraka na području općine Tešanj. Mjerenje je vršeno na lokalitetu Industrijske zone u Bukvi. Naredno mjerenje planirano je za period januar-februar 2019.godine.



Rezultate mjerenja :

## 9. TABELARNI PRIKAZ REZULTATA MJERENJA

### 9.1. Kvalitet zraka

**Tabela 8.** Rezultati izmjerenih vrijednosti polutanata za period 04.09.- 04.10.2018. godine

Polutant	Period usrednjavanja	Granična vrijednost ( $\mu\text{g}/\text{m}^3$ )	Tolerantna vrijednost ( $\mu\text{g}/\text{m}^3$ )	Prosječna izmjerena vrijednost u periodu izvještavanja ( $\mu\text{g}/\text{m}^3$ )	Maksimalna izmjerena vrijednost u periodu izvještavanja ( $\mu\text{g}/\text{m}^3$ )	Broj prekoračenja tolerantnih vrijednosti polutanta
SO <sub>2</sub>	Jedan sat	350*	395*	19,1	483,26	3
SO <sub>2</sub>	Jedan dan	125*	125*	11,7	46,28	0
NO <sub>2</sub>	Jedan sat	200*	230*	11,23	20,9	0
NO <sub>2</sub>	Jedan dan	85*	97*	11,08	21,43	0
CO	Osam sati	10*	11*	0,90	1,04	0
CO	Jedan dan	5*	6*	0,89	0,97	0
PM10	Jedan dan	50*	59*	6,39	15,0	0
O <sub>3</sub>	Osam sati	120*	-	45,60	115,78	0

### 9.2. Ukupna taložna materija

**Tabela 9.** Granične vrijednosti imisije za ukupnu taložnu materiju

Vrsta zagađujućih materija	Period uzorkovanja	Prosječna godišnja vrijednost ( $\text{mg}/\text{m}^2\text{d}$ )	Visoka vrijednost ( $\text{mg}/\text{m}^2\text{d}$ )
<b>Ukupna taložna materija</b>	Jedan mjesec	200	350*

\*Napomena: odnosi se na mjesec u godini sa najvišim vrijednostima depozicije/taloga

**Tabela 10.** Rezultati mjerenja imisije ukupne taložne materije

Mjerno mjesto	Uzorak	Ukupna taložna materija ( $\text{mg}/\text{m}^2$ dan)
Preduzeće Pobjeda d.d. Tešanj	1T	133

### 9.3. Emisije buke

**Tabela 11.** Rezultati mjerenja nivoa buke

Datum mjerenja	Ekvivalentni nivo buke L <sub>eq</sub> (dB (A))		L <sub>1</sub> (dB(A)) Nivo buke koji pojavljuje 1 % vremena mjerenja		NAPOMENA
	Izmjerena vrijednost	Dozvoljena vrijednost	Izmjerena vrijednost	Dozvoljena vrijednost	
04.09.2018	43,6	65	61,2	80	Zadovoljava

# PROVOĐENJE PREVENTIVNIH MJERA ZAŠTITE OD POPLAVA

U skladu sa vanrednim i planskim aktivnostima na provođenju preventivnih mjera zaštite od poplava, kao i sanaciji klizišta u 2018. godini, započela je prva faza čišćenja i uređenja korita vodotoka koja obuhvata područje MZ Karadaglije, MZ Dobropolje-Mekiš, MZ Jelah i MZ Rosulje. Trenutne aktivnosti obuhvataju čišćenje i proširenje korita u dužini od 1.570 metara, i izgradnji obaloutvrde u dužini od 60 metara. U okviru ove faze preventivnih mjera sanirano je i jedno klizište u MZ Karadaglije (put Zaimovići). Navedene aktivnosti se provode u skladu sa zahtjevima mjesnih zajednica i na osnovu utvrđenih prioriteta Općine Tešanj.



